

摛藻堂四庫全書薈要

史部

欽定四庫全書叢書要

史部

硃批諭旨卷一百七十五之四

詳校官編修臣繆晉

欽定四庫全書會要卷八千一百三十六

史部

硃批嵇曾筠奏摺

一百七十五之四

硃批嵇曾筠奏摺

雍正十一年三月初七日吏部尚書總督江南河

道臣嵇曾筠謹

奏為欽奉

上諭事雍正十一年二月二十一日接到大學士張廷  
玉寄字內開雍正十一年二月十二日奉

上諭年來嵇曾筠辦理河工甚為妥協但黃河工程關係緊要除嵇曾筠外欲更覓一明曉河道情形者不得其人朕思高斌現在江南管理鹽政若從此講論河工事務將來可望熟練著就近在嵇曾筠處學習並非以嵇曾筠不能專理更須人協助也爾可寄信與嵇曾筠令其留心教導竝寄字與高斌令其加意學習凡有題本奏摺之處高斌俱不必列名欽此遵旨寄信前來

臣跪讀

聖諭感戴

高厚莫可名言竊臣樗櫟庸材仰荷

知遇隆恩教養優渥自奉

命宣防由北河復調南河叨膺重任凡關係運道民生

修守工程皆蒙我

皇上睿訓精詳披圖指示俾臣審度其形勢體認其性

情一切疏築機宜隨時隨地凜遵

指授方畧敬謹奉行是以幸有就緒迺蒙

天語褒嘉以臣年來辦理妥協欽承之下愧悚交切更  
蒙

皇上軫念河工緊要著管理鹽政臣高斌就近學習感  
忭尤深臣去冬查閱工次於揚州曾見高斌已心  
識其為人謹慎明白今奉

特旨學習臣惟有將數年以來欽承

聖訓指示開導之處悉心與高斌講究是臣一身殫竭

駕駘未能仰報

皇恩於萬一而更得人以圖維善後臣之幸也臣敢不

與高斌備細指陳明切講論以期熟練以副

聖懷所有臣遵奉

諭旨緣由理合繕摺恭謝

天恩伏祈

皇上睿鑒謹

奏

高斌居心甚屬可取行止亦頗端正但嫌其器局褊狹

耳其加意訓導以造就之以卿年齒學問而論儘堪為  
伊師長不必稍存物我之跡而猶有間隔也

雍正十一年四月十五日吏部尚書總督江南河

道臣嵇曾筠謹

奏為恭報糧艘全數北上運河水勢深通仰祈

睿鑒事竊臣於四月初旬親往邵宿一帶查閱工程兼

催重運見漕船銜尾遄行俱已渡黃北上所有宿

遷境內駱馬湖向來四五月間水皆乾涸艱於濟

運臣於上年秋冬之際嚴飭廳汛多築草壩週圍  
收束水勢廣為儲蓄昨桃汛過後正值糧艘盛行  
需水接濟隨將各草壩挑開湖水俱從十字河口  
暢注運河滔滔滾滾充滿漕渠既可免於盈溢而  
漕艘通行又得資其浮送再查桃源縣運河古城  
汛內舊有砂礓一道橫亘河身是以重運經臨每  
多淺澁臣於上年將砂礓開挖深通不用多人挽  
拽而舟行已自便捷又邛宿運河西岸舊有黃墩

一湖上受徐邳睢三州縣唐宋山等處會歸之水  
因岸繞堤環水無出路遂致日積日盈漫延阡陌  
臣亦於上年

題明動帑一千餘兩并檢取沿河舊石建造小閘一  
座開放積水不惟濟運有資而且涸出湖灘千有  
餘頃小民布種二麥今一望黃雲芃芃茂密白叟  
黃童共樂豐收至於黃運湖河歲搶工程臣俱逐  
一詳加確勘指示機宜飭令該管各官上緊儕修

下埽加釶務使高出水面八九尺至一丈餘不等  
足可抵禦汎水預為保護臣因時當四月重運漕  
船全數出境且伏汎將臨工程業已償修齊集有  
備無患謹繕摺奏

聞恭慰

聖懷伏祈

睿鑒謹

奏

覽奏運河水勢深通糧艘利涉無阻竝工程齊備各情形朕心深慰卿宣防有術殊屬可嘉

雍正十一年五月二十八日大學士仍管理江南

河道總督事務臣嵇曾筠謹

奏為時雨霖足水勢工程平穩情形仰慰

聖懷事竊照江南黃運湖河水勢今年桃汛以來俱各

循軌安瀾臣已節次

奏明在案屆茲五月淮揚一帶時雨連綿水勢頻加

長發然皆隨時消落上下河湖咸資容納甚為寧  
謐臣以伏汛將臨恐上源水勢驟長一面飛飭禹  
王臺廳汎查看沂沐諸水謹守竹絡壩工竝將駱  
馬湖尾間之六塘河暨運道內之鹽河各處入海  
要路預為疏濬深通以備水長分流宣洩入海不  
致有壅滯之患至黃運湖河埽壩工程俱已一律  
修築出水高厚鑲墊堅整足資捍禦廳汎員弁分  
守各工加緊保護臣率同兩道不時來往輪流巡

察長堤料物充盈各處工程穩固洵為有備無患  
最可慶者洪澤一湖為淮水總匯之區仰蒙

皇上睿慮精詳預將高堰石工發帑增修高厚足資保  
障全淮所以清水暢出敵黃分流合注總無強弱  
之形實有交濟之美而淮揚諸郡下隰高原永受  
平寧之福也臣來往河堤目擊二麥業已豐收時  
雨又加霑足秋禾蕃盛水勢工程平穩情形理合

據實具

奏仰慰

聖懷伏祈

皇上睿鑒謹

奏

淮黃一帶循軌安瀾俾朕無南顧之憂者洵皆卿之力  
也

同日又

奏為洪湖禹廟告成恭請

宸翰頒賜匾額永光萬祀事竊照高堰大堤有

禹王廟一座前因幫築石工暫行拆卸荷蒙

皇上奠安河岳崇德報功特頒

諭旨重新修葺臣凜慎欽遵業經擇吉興修於上年十

二月初一日完工隨敬謹繕摺恭請

皇上頒賜

御書匾額以昭

盛典奉

旨俞允在案惟是祠宇落成之後濱湖萬姓皆以堤工

鞏固保障淮揚從此田廬儲蓄永荷

皇仁怙冒扶老攜幼齊赴

神前祝延

萬壽無疆覩茲暎碧流丹亟望

龍文丕煥恭求

聖天子之

寶翰聿光億萬年之駿烈臣不揣冒昧再為

奏請伏祈

皇上頒賜

宸章臣駿謹鉤摹肅誠懸挂則來往觀瞻仰

匾額書就已命發來此時諒應齋到矣

聖藻之輝煌實增光於日月矣抑臣再有請者山東鄰

城縣馬陵山下竹絡石壩工程遏沫水之奔流作

淮郡之保障最關緊要經臣具疏

題請荷蒙

皇上發帑興修久已完竣但雍正八年沫水泛張之時

將舊建

禹王廟一座衝湍無存止有

禹王神像隨水漂流仍至鄰城縣北門外回向馬陵  
山口巍然獨坐從神二像亦相去不遠遙為侍立  
及後水落波恬雲開日霽金光照耀於淖泥淤土  
之中居民驚異迎至郊外朝陽寺內權且供奉於  
大門之下非所以妥侑神靈臣敬懇

皇上天恩於河庫道存貯銀兩內動支銀一千兩飭發

地方官擇於竹絡壩附近山坡高阜之處建造廟宇一所迎回

禹王神像供奉妥協并飭該地方官春秋致祭我皇上恩綸普被錫福無疆巍清寧而合撰洽流峙以垂休矣臣未敢擅便為此一併繕摺請

旨伏祈

皇上批示遵行謹

奏

建祠奉祀此奏甚是但四載周巡平成水土為萬世生  
民永賴厥功厥德猗歟盛哉若廟宇湫隘殊近於亵千  
金之費恐不足以壯觀瞻其再加酌計式廓為佳

雍正十一年七月十八日大學士仍管理江南河

道總督事務臣嵇曾筠謹

奏為伏秋交會水勢工程平穩上慰

聖懷事竊照今歲伏汛平安業經

臣恭摺

奏明屆茲七月初旬淮揚一帶久晴之後連沛甘霖

水勢陡長兼之六月初七日寧夏府又報黃河水  
長三尺一寸臣按日計程正當伏秋交會之前  
水未消後水踵至又兼風雨甚大最係工程喫緊  
關頭亟須加謹保護臣督率道廳將弁往來巡查  
凡有險要處所星飭該管汛員兵目於挑壩添椿  
邁埽加鑲高厚於堤灣接崖衛岸竭力搶護幸物  
料豐盈兵夫齊集靡不立時應手而且派委多員  
策應隄防不敢稍懈仰賴

皇上敬誠感格黃運兩河獲保安瀾查外河廳屬老壩  
口洪福莊潰崖搶下大埽二路計長二百丈桃源  
廳屬李九莊頂衝搶下大埽計長七十二丈據該  
廳等詳請題估大工需帑三萬餘兩臣查歲搶料  
物辦貯工所實在豐多葦蕩柴束令歲羨餘更倍  
臣又飛飭兵夫在洪澤湖搶割蓑芬草六十餘萬  
束皆天地自然之利堪充公用所以前次大工俱  
可立辦無庸再行題估臣仰蒙

皇上天高地厚格外

洪恩惟有殫竭血誠力圖報稱於萬一所有伏秋交會

黃運兩河水勢工程平穩情形謹繕摺奏

聞上慰

聖懷伏祈

睿鑒謹

奏

今夏上流水勢過盛朕正為南河懸念覽奏慰不待言

啟莫能已

雍正十一年八月初十日大學士仍管理江南河

道總督事務臣嵇曾筠謹

奏為恭報睢寧天賜引河各工安瀾普慶據實奏

聞仰祈

睿鑒事竊查邳睢廳屬黃河南岸王家堂向因北岸沙  
灘挺入河心頂衝直射異常危險歷歲修防方能  
保固今年伏水異漲臣嚴飭廳營晝夜加鑲邁埽

正在竭力搶護忽然大溜衝激將北岸挺入河心  
之沙灘刷成河形引水東注其南岸頂衝埽壩工  
程漸為平緩頃自入秋汎水漲發竝將靠北大灘  
埽崖衝洗奔騰浩瀚大溜自西而東開闢正河一  
道王家堂埽外現長沙灘八九十丈不等新沙驟  
湧已將綿長三百餘丈之埽工全行淤閉竟可停  
止修防矣節據道廳詳報臣復勘驗無異竊思黃  
河老灘橫亘若無吸川建瓴之勢既難開窪引河

即使得勢開挑工大費繁經時累月未易成功今  
乃不費一夫之力而倏挽九曲之狂瀾頓成一旦  
之功而全消數年之積患

天賜引河地呈上瑞不特本工化險為平抑且上游既無  
屈回下游又得順流萬里歸宿之區全河暢達所  
關重大是以濱河父老在工兵夫莫不額手歡呼  
踴躍忭舞共慶南工從來未有之異瑞也臣往來  
河涘目擊身親忽覩麻祥之淤至倍功懽欣夙叨

聖訓之諄詳愈加儆惕所有睢寧自闢引河各工平穩

情形除恭疏具

題外謹繪圖貼說據實奏

聞伏祈

皇上睿鑒謹

奏

此實由於

上天垂祐河靈默助所致真祥瑞也覽奏欣幸何似

雍正十一年九月初六日大學士仍管理江南河

道總督事務臣嵇曾筠謹

奏為奏

聞事竊照沿海范堤工程侍讀學士臣西柱奏請大為

修築蒙

硃批諭旨南北各堤通盤修整之處言之嵇曾筠聽其酌度而行欽此欽遵臣於八月二十日自清江浦起

程率領道廳并該地方州縣印汛等官沿堤確勘

查宋臣范仲淹創築此堤原皆因地因時酌量建  
設嗣後瀕海竈戶隨圮隨培自為修補經今六七  
百年時異勢殊海汎之遷徙不常居民之聚散不  
一地形之高下不同往往有昔與海近而令相隔  
迂遠者亦有昔與海遠而令漸成逼近者則堤岸  
修舉自當因去海之遠近分別工程之緩急方能  
利商民而收實效臣自淮安府阜寧縣之廟灣  
場起至通州之呂四場止共計二十五場延亘六

百餘里除泰州屬之栟茶角斜二堤范堤臣於去  
年冬月逐加踏勘相度情形議於舊堤內移進四  
五里建築越堤一道繕措具

奏旋經西柱遵奉

諭旨動用運庫商捐銀二萬三千四百餘兩建新補舊  
一律完竣現令捍禦鹹潮毋庸再議興修外其次  
則有如阜縣屬之豐利掘港馬塘并通州屬之石  
港西亭金沙餘西餘中餘東呂四等十場亦經西

柱擇其殘缺之處動支運庫捐銀量行修補其餘  
未經修及之工竈戶鹽總亦自行率衆修葺幫補  
高厚一律完整是可無庸修築者也再有泰州屬  
之富安安豐梁垛東臺何垛五場現在地勢高阜  
人煙稠密廬舍市廛迴環聯接居住年深日久查  
勘舊堤有改作民房全無基址者有僅存堤形者  
訪之居民耆老僉云百餘年來海潮去遠久不聞  
有鹹水灌入村莊之事是此堤之不必重修明矣

又興化鹽城阜寧各縣屬之白駒伍祐廟灣三場  
現存舊堤雖高矮不等但細贍情形地勢俱屬高  
阜去海亦遠訪之居民者老僉云潮水甚大之時  
離堤尚有十餘里竝未嘗漫及堤根是此地之范  
堤所係實非緊要均可緩為修築者也祇有地勢  
低窪如泰州屬之草堰場應修堤六百一十二丈  
小海場應修堤一百零三丈丁溪場應修堤四百  
三十二丈并興化縣屬之劉莊場應修堤二百四

十五丈鹽城縣屬之新興場應修堤六十餘丈共  
計范堤通長一千四百五十餘丈相度地形卑下  
必宜再為增培應行間段加修自二三尺起至五  
六尺不等築成一律高厚以上各工共估計動用  
運庫捐銀三千餘兩即足以捍禦潮汐可資屏障  
矣總之濱海堤工原藉以約攔水勢如潮水漸近  
即當作速興修急圖保護如潮水去遠即當緩其  
修築以節錢糧未便執前人之成迹而於遠近緩

急之機宜槩置之不問也

臣仰體

皇上恤商愛民之至意詳勘情形再三斟酌請照黃運

兩河堤岸之例召募附近居民充當堡夫每日挑

積土牛修補殘缺卑薄并搜捕獾鼠填墊水溝每

夫一名月給銀五錢每歲約計銀二千餘兩仍令

各場大使就近募充每月動支庫捐銀散給其

修理堤工責成汛員查核催趲從此日增月累范

堤可無殘缺之虞庶幾帑不虛糜工收實效似於

栽培商力保護民生兩有裨益臣愚昧之見是否  
有當謹將勘過情形據實繕摺奏

聞伏祈

皇上訓示遵行謹

奏

卿既再三斟酌自中肯綮朕焉有信不及處即照所議  
施行可也

同日又

奏為請

旨事竊臣荷蒙

皇上天恩特授大學士仍管理江南河道總督事務臣

感激

隆恩即擬趨赴

闕廷恭觀

天顏因於具疏

奏謝時并陳下悃復蒙

皇上鑒臣戀

主心誠

恩諭霜降後請

旨再來臣聞

命之下望

闕叩頭歡忭難名今已九月初旬霜降伊邇臣業經繕

疏奏請籲懇恭覲

天顏現在祇候

聖旨伏念河防諸事錢糧重大頭緒繁多專藉人工修

守臣竊見管理兩淮鹽政臣高斌奉

旨學習河務虛衷聽受每多領會且人品端正從此忠

勤率屬定當砥礪有成可否將總河印務即交署

理容臣於霜降後星馳

北闕俾得與在

廷諸臣隨班拜舞嵩呼

萬壽則臣十有餘年瞻

天仰

聖之忱得以稍抒於萬一感荷

天恩高厚實銜結於生生世世矣為此敬謹繕摺恭請  
訓示遵行伏祈

皇上睿鑒謹

奏

高斌學習未久尚未熟諳今歲卿且不必來京於明年  
霜降後再行奏請候朕斟酌有旨

雍正十一年十月二十二日大學士仍管理江南

河道總督事務臣嵇曾筠謹

奏為請定兵夫積土成例以固堤防以收實效事竊照江南黃運兩河堤岸綿遠祇有河兵看守埽壩一遇汎水長發各處調撥分身乏術以至長堤之上防護無人臣於雍正九年八月內

題請循照豫省之例每堤二里添設堡房一座召募堡夫二名每名按月給工食銀五錢即令堡夫常

川防守挑積土牛以資修補堤工之用荷蒙

皇上恩准照例添設欽遵在案今臣嚴加督率按堡稽

查除寒暑兩月免其積土外其餘每月黃河一堡

二夫責令積土十五方運河一堡二夫除糧船往

返修補犁溝櫛眼外責令積土十二方以一年合

算可以積土十五萬餘方已收費少工多之效惟

是堡夫有勤惰不齊該管汎官亦有賢否各別設

不嚴立章程則日久法弛難於查察臣請核定成

規以雍正甲寅年正月為始責令該管汎官將所屬汎內堡夫從前積過土牛逐堡挨查確實作為舊土報明備案即於正月起照依前定數目每名按月如數挑積仍將挑過之土每月造於新土冊內彙報算入交代以專責成若不能如數挑積者將專汎文員罰俸一年該管廳員罰俸半年倘或挑積不及一半即將耑汎文員降職一級暫留原任戴罪遴挑該管廳員罰俸一年如此則廳汎各

員畏干處分之例自必上緊督率挑積矣再查河  
兵舊例每年桃伏秋三汛俱在埽壩力作惟於霜  
降後計算兩月日期照堡夫例每二名一月積土  
十五方堆積堤工備用令查黃運兩河除椿夫埽  
手撐駕浚船并各該將弁養廉之外實在力作河  
兵約計五千名共應積土七萬五千方亦應將所  
積土牛查明造冊入於該備弁交代項下以專責  
成若該管備弁不勤加督率亦照前定之例分別

查叅議處似此章程一定則兵夫自無間曠錢糧  
不致虛糜既資防守之益復成積累之功伏查雍  
正七年荷蒙

皇上屢念河堤每年加修五寸沿河黎庶莫不頂頌

聖恩安益求安之至意今復設有堡夫嚴其課程而於

水勢緊要堤工單薄之處多積土牛霜降以後即

將本汛兵夫所積之土增培本汛單薄之堤止須  
酌給潑水行硪之費在於每年歲修加高冊內據

實聲明以節錢糧務令該管員弁盡心董理修築  
堅固如此兩三年後并加高五寸之工亦可逐漸  
減省而堤工得免殘缺卑薄之虞矣臣因

國帑堤工攸關重大誠恐奉行日久或致玩誤廢弛  
合應仰懇

睿裁著為定例則日久見效錢糧既可節省堤工又復  
鞏固實荷

皇仁於億萬斯年矣謹繕摺恭

奏伏祈

皇上訓示遵行謹

奏

兵夫積土著為定例既可節帑又以護工足見奉公體國之誠斯議嘉是覽之如應題達具疏題奏以聞

雍正十一年十二月初一日大學士仍管理江南

河道總督事務臣嵇曾筠謹

奏為

聖恩亘古特隆微臣感激難名恭申謝悃并陳明臣母

緣由仰祈

睿鑒事竊臣接閱邸抄奉

上諭大學士嵇曾筠敬慎居心忠勤襄事自簡任河道  
總督以來整理有方調度合宜即如今年直隸豫省  
堤工潰決而江南地處下游不但各工平穩且有自  
開引河之瑞此實嵇曾筠殫力宣勞之所感召且江  
南河務今年工程較多所用物料加倍而所費錢糧

較從前減省茲又奏請將葺蕩營出產柴束立定章程償運交工濟用具見實心實力鉅細不遺深屬可嘉朕念伊父之忠義伊母之節操雖已贈恤旌褒尚未膺一品封典今特沛殊恩著給與大學士應得誥封以示優眷欽此臣跪聆之下當即恭設香案望

闕九叩恭謝

天恩訖伏念臣以庸愚生逢

堯舜優頌懋賞疊貢

溫綸浹髓淪肌備沫

天家膏澤自頂及踵無非

聖主生成迺更荷我

皇上推恩之大典錫類之

洪慈憫念臣父殉忠臣母守節

特加一品封誥用彰三代榮施恭膺希世

隆恩非常

曠典捫心叩首嗚咽難言縱竭捐糜

高深莫報惟是臣福薄罪深臣母忽於前月之底疎患  
疾證臣正在郊宿一帶查料勘工飛騎奔回急為  
調治不料病勢沉重風燭難支惟有口誦

佛號頂謝

聖主洪恩勉臣盡忠竭力并勉臣子臣孫世世銜結以  
圖仰報臣自念一身微末報恩惟有

君親今臣母奄奄一息臣已罔極難酬罪無可逭而猶

幸今日之得奉湯藥慰藉於彌留之際皆荷

皇上殊恩特沛

優眷榮加臣即生生世世願為犬馬總難效涓埃於萬  
一也臣更有請者臣母旦晚難保臣遵照定例謹

擇淮徐道呂維炳代為辦理一面移咨漕臣具疏

題報候

旨離任守制外伏查河工學習鹽臣高斌居心行事久  
在

聖明洞鑒之中本年十月復來清江臣將形勢機宜工

程底細剖晰講究復派工員隨伊遍歷黃運河湖  
一應工程伊俱能虛心體認專心學習倘蒙

皇上天恩畀以署理印務自必愈加勤慎出力報效則  
管理有人臣即可循例邀

恩守制仰荷

鴻慈高厚結草銜環永永靡既矣臣不勝感激悚切之  
至謹繕摺恭謝

天恩伏祈

皇上慈鑒謹

奏

自開闢以來仙佛尚然解化人生豈無終極以卿母之年而論曰福曰壽可謂世所罕覲況兼懿範清操足堪不朽在卿更可謂克盡子職纖毫無憾萬勿深維罔極過於悲傷倘至毀瘠莫支則翻違忠孝大義矣其減損哀慟以釋朕之懸念

雍正十二年四月十五日大學士仍管理江南總

河事務在任守制臣嵇曾筠謹

奏為奏

聞事竊臣於正月間蒙

聖恩給假回籍旋於三月內起程四月初二日已抵淮  
安伏見大江南北麥苗盈疇長養秀實現在次第  
收穫盈寧有慶遐邇騰歡此皆仰賴我

皇上恩膏疊沛蠲賑頻施截漕折色事事周詳用是米  
價甚平閭閻喜悅雨暘時若二麥豐收臣於一路

查勘瓜洲江工穩固潮汐安瀾漕運糧船皆銜尾  
渡黃北上駱馬湖蓄水充盈濟運遄行無阻各廳  
桃汛工程經署河臣高斌加謹催趲業已

奏報平安臣現在奔走河干親赴上下要工逐一查  
勘督率修防與高斌同心協力寅恭辦理惟願黃  
准永奠億兆咸寧以期仰副

皇上慎重河防愛養元元之至意敬將江南地方二麥  
豐收並黃運湖河現在水勢工程平穩情由繕摺

奏

聞伏祈

睿鑒謹

奏

深慰朕懷

大學士仍管理江南總河事務在任守制臣嵇曾

筠署理江南河道總督印務臣高斌謹

奏為請築月堤移建閘座以禦汎水以固河防事竊

查海防廳屬黃河南岸辛家蕩縷堤坐當全黃尾  
間年來北岸長有沙灘逼溜南趨掃灣山刷河崖  
塌卸致成迎溜險工將來汎水長發衝射堤根危  
險堪虞臣等親往查勘相度情形縷堤南首版荒  
地內應圈築月堤一道避其激湍之勢順其就下  
之性庶幾未雨綢繆有備無患再辛家蕩縷堤舊  
有減水石壩一座係康熙四十年間經前河臣張

鵬翮

題建以備宣洩黃河異漲之水嗣因黃流順軌海口  
深通堤內村莊聯絡居民稠密自始迄今此壩從  
未開放墊陷泥淤廢棄已久現今大溜南趨逼近  
壩臺將來勢必塌卸自應相機將舊石議拆移運  
別工應用今查揚河廳汎內寶應縣西堤向有竹  
絡壩一座原備宣洩運河之水前於雍正九年因  
壩底年久虛鬆經臣曾筠於亟請下埽等事案內  
題請另建新壩一座照例蓄洩在案但水長即挑開

埽壩放水以保堤工水落即下埽堵閉蓄水以資漕運既非一勞永逸之計且有遞年修築之頗臣等愚見不若將辛家蕩舊石拆於寶應西堤審擇堅實地基改建減水石閘因時啓閉蓄洩咸宜且建閘之後即可將舊時埽壩永遠堵閉一轉移間不特將無用舊石皆成有用可以節省錢糧而揚屬運河一帶堤工益資鞏固漕運民生均有裨益矣至辛家蕩月堤計長七百丈估費四千四百餘

兩現在照例發帑飭令淮揚道監工上緊趲築堅  
固以禦汎水并將移建閘座工程悉心確估造冊  
具

題請

旨外所有臣等公同勘估辛家蕩工程情形謹先繪圖  
貼說繕摺恭呈

御覽伏祈

皇上訓示遵行謹

奏

因地制宜移彼就此卿之措施諒應不謬也

雍正十二年八月初一日大學士仍管理江南總河事務在任守制臣嵇曾筠署理江南河道總督

印務臣高斌謹

奏為恭報水勢工程平穩仰慰

聖懷事竊查秋汛屆臨正諸水長發盛行之候臣等凜

遵

聖訓加倍小心率領道廳員弁分駐工所曉夜防守目  
令徐邳淮揚雨暘時若黃水亦次第長落雖入秋  
以來風勢甚大而埽壩鑲墊加高不致湧激為患  
黃運各工在在鞏固洪澤湖為刷黃濟運之要區  
蓄洩機宜最關緊要臣等悉心體察相度水勢將  
天然壩及早堵閉俾清口益為順暢敵黃東注兼  
之豬蓄湖水以濟來年運行預備有益至江潮浩  
瀚瓜洲工程頗為喫緊臣等俱親經查勘督率修

防加埽壩以禦潮頭下碎石以護崖根江干一帶  
工程俱獲安穩今七月已過八月正屆雖秋汛綿  
長而各廳料物充裕足資捍禦所有現在水勢工  
程平穩情形謹繕摺會

奏仰慰

聖懷伏祈

睿鑒謹

奏

覽奏水勢工程平穩情形遙望江淮且欣且慰

雍正十二年九月十五日大學士仍管理江南總

河事務在任守制臣嵇曾筠南河副總河臣白鍾

山謹

奏為酌量調撥兵夫挑濬清江引河以利漕運以節

錢糧仰祈

睿鑒事竊照裏河廳屬之清江浦有龍汪石閘一座當

南北通津運道民生攸關緊要因建造已久百餘

年來未經修理水勢湍急根底虛鬆北岸迎水石  
牆蟄却三丈餘尺其餘閘牆亦多脹裂亟須重加  
建築以濟漕運現在飭令淮揚道確估閘座工料  
另行造冊具

題請

旨外臣等伏思拆閘重建築壩興工動經數月方能告  
竣轉瞬春融重運北上恐誤遄行今於龍汪閘迤  
上數里之外鳳陽廠地方自五孔橋至張雲壠口

查有舊引河一道長一千五百餘丈年久淤墊形  
址猶存宜先將此河挑濬寬闊一律深通俾運河  
之水得以由此通流無誤明春運行方可築壩興  
修閘座隨搬行道廳等勘估挑濬引河需土二十  
七萬六千餘方計銀二萬二千一百餘兩又以挑  
河之土幫高兩岸堤工應用發水夯硪并創築新  
堤計銀一萬一千九百餘兩以上挑河築堤共銀  
三萬四十餘兩加以建閘工料未免需費繁多臣

等再四籌畫節省辦理查江南河工額設河兵堡  
夫一萬餘名目令霜降已屆各廳營修防事竣正  
值兵夫閒暇臣等酌量於通工內抽撥兵夫調赴  
清江浦勒限挑築每名每日給飯食銀二分業於  
九月初六日動土開工尅期完竣只需飯食夫工  
銀一萬二千餘兩較比漕規實計節省銀二萬二  
千餘兩不特來年重運漕船得以遄行無阻且閘  
工修竣後又可留此河身以為運河水長之時預

備宣洩之用似於運道民生均有裨益所有調撥  
兵夫開挑引河節省錢糧以利漕運緣由理合恭  
摺

奏明伏祈

皇上睿鑒謹

奏

如此經營可謂辦國計如家務矣褒獎之外更有何諭  
雍正十二年十月二十八日大學士仍管理江南

總河事務在任守制臣嵇曾筠南河副總河臣白

鍾山謹

奏為酌減漕規以節錢糧事竊照河防全在土埽工  
程既當修築堅固帑項又須因地制宜隨時酌減  
方為有益臣等上下巡查見所屬工料俱比從前  
豐足堅實詳悉籌維土埽二工尚有可以節省之  
處敬為我

皇上陳之

一土工方價宜分別酌減也查土方則例業經酌減分出水旱遠近乾溼擬定成規部覆准行在案但土頭有厚薄不同人夫有強弱各異向例各廳土工漕規例係畫一未曾因地分晰今臣等詳細分別各廳除高堰山時裏河揚河江防五廳或緊臨漕運或接比河湖大江而且居民稠密取土不易土方價值無庸再減外查徐屬邳睢宿虹三廳壞地寬廣取土便宜其於方價尚可再減十分之

二至桃源外河海防山安運河桃清六廳貼臨河  
湖一面取土其於方價亦可再減十分之一如此  
則每年土工方價酌減報銷工程不致草率仍可  
照估價修

一防風埽工用料宜酌減也查黃運河湖水深之  
處所下沉水埽箇與加鑲埽料水勢湍激工多蟄  
陷料物自應照依向定漕規不能改減其水淺之  
處恐有風浪汕刷於堤根鑲做防風保護崖岸舊

例每單長一丈用柴三十八束或用草一千一百四十斤但前項工程雖亦有蟄陷不比頂衝首險其料物尚可減省今酌定柴鑲防風每單長一丈減去柴八束用草加鑲者減去草二百四十斤以省工料再查前項防風工程從前因所用料物與鑲墊之工相同是以有開報防風者亦有開報鑲墊未經指出防風字樣者今既酌減工料則嗣後每年估銷冊內應將水勢深淺并防風字樣逐一

聲明以便查核報銷倘有不將水淺防風據實聲  
明者容臣等查出參處以上酌減土埽二工錢糧  
皆因比年以來仰賴

皇上聖德感孚水勢工程平穩年豐人和民力寬舒因  
時因地斟酌損益請於雍正乙卯年為始照酌減  
之例核明造冊估計銷算於帑項可以節省而工  
程仍復鞏固所有現今酌減土埽二工漕規謹據  
實會摺啟陳是否有當伏祈

皇上訓示遵行謹

奏

因時因地酌減土埽漕規具見忠誠任事自屬節用良  
籌然朕以為不必定作成例奏銷時仍照舊造報惟於  
題本內聲明情由將所減銀兩存貯河庫以備別項工  
程之用殊覺妥協卿意何如

雍正十二年十二月初四日大學士仍管理江南  
總河事務在任守制臣嵇曾筠謹

奏為恭謝

天恩事本年十二月初一日臣齋摺家人恭捧

皇上恩賜鹿尾五箇鹿肉二盤野雞六隻臣隨跪迎道

左恭設香案望

闕叩頭謝

恩祇領訖伏念臣自蒙豢養備沐

鴻慈忝司河務以來十有餘載

恩勤篤摯無一時不仰厪

聖懷無一物不仰霑

聖澤茲復榮邊

眷注

寵賚特頒彩煥黃封捧到

尚方之仙脯親調丹液幸嘗

內府之嘉珍截肪裁脂馨香遠布淪肌浹髓感激難  
名竊臣年六十有餘雖係餘生尚堪竭蹶馳驅力

圖報效惟有事事稟承

睿訓時時仰體

聖心早夜圖維恪恭趨走俾百谷朝宗之境兩河血氣  
之倫咸飲和食德於

深仁厚澤之中悉含哺鼓腹於  
斯固朕之至願所夙夜匪怠以期仰答

化日光天之下庶以仰報

皇

考者也此外夫復何求

皇上天恩於萬一耳所有微臣感激愚忱謹繕摺恭謝  
天恩伏祈

皇上睿鑒謹

奏

覽卿奏謝知道了

雍正十三年二月初二日大學士仍管理江南總

河事務在任守制臣嵇曾筠署理江南河道總督

印務臣高斌謹

奏為雨雪應時麥苗滋長運道深通仰慰

聖懷事竊照徐邳淮揚一帶於除夕元旦等日俱降瑞  
雪盈尺普遍千有餘里立春前後又復甘雨綢繆

臣等巡視堤工見兩岸麥苗滋潤長發運河春水充足清江浦鳳陽廠新開引河現今水勢深通糧艘遄行連牆北上其舊運河因修築龍汪閘座將河身兩頭築壩肩水乾涸頂底畢露臣等逐細查勘除兩邊雁翅石牆尚有堅整之處并月河閘座通體完備俱不必議修外惟將龍汪大閘金門兩牆蟄卸處所重新建築所需面裏等石業將諸家溝淤墊舊閘一座拆運該工濟用毋庸赴山開採

以節帑項祇有椿木米汁石灰錠鍋夫工等項現在核實確估務期籌酌妥協方敢具

題其上下各處運河因湖水蓄蓄充裕藉以接濟一律深通竝無阻滯黃運兩岸埽土工程趁此春融之際業經詳悉指示廳營實力修做在在高堅以禦桃汛所有雨雪應時通道深通緣由臣等謹繕

摺奏

聞伏祈

皇上睿鑒謹

奏

據奏堤岸高堅桃汛有備朕懷已慰及聞雨雪應時春水充足等語則帆檣上下浪靜波恬景象宛然在目也曷勝愉悦之至

雍正十三年三月二十日大學士仍管理江南總河事務在任守制臣嵇曾筠署理江南河道總督

印務臣高斌謹

奏為據情代奏恭謝

天恩事竊照准徐道呂維炳為伊子取結致書囑託旗員一事荷蒙

皇上天恩從寬革職留任免其解京質審臣等欽奉

聖諭即傳呂維炳至署敬謹宣示呂維炳跪聆之下免冠叩首感激涕零隨據稟云仰沐

皇上高厚鴻慈自今以往惟有洗心滌慮悔改前非勤慎辦工力圖報效所有項感血誠懇請代為奏

聞等語臣等敬體

天心復再三訓飭勉其痛除習氣實心出力以仰副  
皇上軒念河防愛惜人材之至意查道員雖無代

奏謝

恩之例今臣等目覩呂維炳感激

天恩情詞迫切出於至誠不敢壅於上

聞謹會同繕摺恭

奏伏祈

皇上睿鑒謹

奏

勗其勉為良吏慎勿貌從心違如傳所云揜其不善而著其善見君子而後厭然也

雍正十三年四月十五日大學士仍管理江南總河事務在任守制臣嵇曾筠署理江南河道總督

印務臣高斌謹

奏為酌添墩舖巡船以資防守仰請

聖訓事竊照陸路墩鋪與水路巡船均為防範汎地杜  
戢姦匪之要務必須布置周密聲勢聯絡方足以  
資捍衛而嚴汎守查江南河標所轄水陸營汎為  
南北通衢悉屬衝要差使殷繁撥護絡繹空重糧  
艘及一切民船客貨往來如織水陸汎防均宜慎  
重今查應添設墩鋪之處如南自王家營起北至  
山東交界紅花埠止計程二百六十餘里係進京  
大路其原設墩鋪遠近不一除相隔十里以內道

路均停者不議外其相隔十二三里至十七八里者未免瞭望不及防禦難周又南自清江浦起北至山東交界臺兒莊止計程三百七十餘里係漕運要道其沿河原設墩鋪內有相距十七里至二十里及二十一里不等路途較遠策應維艱臣等詳加籌畫應將寫遠之墩鋪各於適中處酌添墩鋪一座共計添設墩鋪一十六座每座撥兵四名共需兵六十四名各於本營存汎兵丁內輪流抽

撥令其住宿鋪房勤慎防守則兩路墩鋪均無鞭  
長不及之虞汎守益為謹嚴矣又應添設巡船之  
處如黃河自江南清口淮黃交匯處起至河南虞  
城縣交界止計程五百三十餘里沿河一帶地方  
遼曠姦匪易於出沒巡防尤宜嚴密但近岸難建  
墩鋪必得安設巡船撥兵常川查緝以杜匪類而  
保商旅至於運河雖經設有墩鋪但汎兵僅能防  
範於陸路其遊巡河面亦非船隻不可令運河內

惟夏鎮汎舊有巡船一隻黃河內惟銅山睢寧蕭  
陽等縣舊有巡船八隻其下游之桃源宿遷白洋  
隅頭泇口清河清江等汎均係緊要之處向未設  
立巡船臣等酌議應於桃宿等緊要河汎添設船  
隻以資巡緝計黃運兩河共添巡船一十一隻每  
船需兵五名共需兵五十五名亦在於本營存汎  
兵丁內抽撥查照所管河汎往來巡緝勤加稽察  
務使宵小屏絕河路肅清則兩河商船客貨均得

防護安全矣緣有關酌添墩鋪巡船事宜臣等未  
敢擅便是否有當謹繕摺恭

奏懇請

聖訓如蒙

皇上俞允臣等即與督撫臣會疏具

題伏祈

訓示遵行謹

奏

是誠裨益地方之舉會疏題請酌定有旨

同日又

奏為奏

聞事竊照四月初五日夜江間風浪大作所有北岸瓜洲江工數年以來仰蒙

皇上聖明指示堵築夾壩開窓引河以埽護厓以石護埽足資捍禦值此江潮湧激之時埽壩高堅屹如磐石城池田舍保護安寧惟南岸鎮江京口迤下

新河口臨江崖岸有坍塌之處臣等聞信即星飛  
差員馳往查看茲據委員并江防同知等各稟稱  
新河口江崖坍去橫長一里有餘進深八九十丈  
不等沿江民房塌却三百餘間等情臣等查所坍  
之崖距鎮江府城尚遠無關運河要道惟河口內  
向建新閘一座蓄洩水勢以便民船令臣嵇曾筠  
親往勘明後移咨督撫臣轉飭地方印汛官相機  
料理竝確查塌房居民分別撫恤外謹將鎮江偶

遇風潮北岸瓜洲工程平穩情形先行繕摺奏

聞伏祈

皇上睿鑒謹

奏

覽奏知道了聞彼處土人咸云江中有豬婆龍能致風浪之患斯語確否

雍正十三年六月初二日大學士仍管理江南總河事務在任守制臣嵇曾筠南河副總河都察院

僉都御史臣劉永澄謹

奏為恭報伏汛水勢工程平穩情形仰祈

睿鑒事竊查本年夏至以後據寧夏府報稱上游黃水泛漲三尺兼之徐郡一帶大雨時行黃河水勢長發至六尺四五寸不等賴上年霜降迄今底水消落甚多臣等於桃汛之前巡歷各工逐一查察修築鑲墊根底堅實是以黃水雖覺強盛而埽壩高厚屹如磐石現在出水五六尺至八九尺不等足

資捍禦至南岸清口黃淮交會之處必須清水抵  
敵黃流不致倒灌為患今洪澤湖淮水尚未盛長  
誠恐水勢淺弱臣等相度情形將山盱天然壩并  
裏河文華寺閘俱皆堅閉蘊蓄湖水暢出清口敵  
黃東注又將北岸鹽河越壩相機開放分洩駱馬  
湖暨黃河水勢令自徐邳以至雲梯海口循軌順  
流水行沙刷毫無阻滯其各廳購備料物並葺蕩  
營額餘柴束俱經查催儕運酌量工程平險分別

堆貯雖伏秋踵至汛險工長而料物充盈足以濟用通查伏汎內黃運湖河上下各工在在平穩此皆仰賴我

皇上至德精誠潛孚默契

河神鑒佑有如響應臣等奔馳防護踴躍歡欣額手感頌惟有倍加敬謹率領道廳員弁分駐各工小心修守以仰副

皇上慎重河防之至意所有伏汎水勢工程平穩情形

理合繕摺奏

聞伏祈

睿鑒謹

奏

伏汎安瀾朕懷深慰全河保障修守機宜惟卿是賴焉

雍正十三年七月十一日大學士仍管理江南總

河事務在任守制臣嵇曾筠南河副總河都察院

僉都御史臣劉永澄謹

奏為恭報伏秋交會水勢工程平穩情形仰慰

聖懷事竊照江南黃運湖河各工伏汛修防穩固業經  
臣等

奏報在案伏查夏末秋初正二汛交會之候又據寧  
夏府報稱上游黃水泛漲一尺二寸有餘前汛未  
消後汛踵至黃河日見長發工程甚為喫緊臣等  
督率道廳將弁往來策應曉夜搶護物料豐盈兵  
夫齊集靡不立時應手復派委多員常川防守自

徐邳以迄淮揚一切機宜呼吸可通現令上下湖  
河在在寧謐縱秋汎綿長而埽壩高厚足以捍禦  
無患臣等目擊情形惟有額手踴躍敬慎修防不  
敢因工程平穩少萌疎忽之心又查六月間淮揚  
地方天氣久晴民間望雨甚殷臣等仰遵

聖諭虔誠祈禱屢次俱沛甘霖但未十分霑足復將運  
河內閘壩涵洞開放分洩灌漑民田又虞淮水勢  
弱隨於黃淮交會處所趨進埽箇收束口門俾清

水刷黃有力合流東注循途順軌以達於海至時  
屆秋令沿海范堤工程保衛鹽場民舍攸關緊要  
臣等遵委幹員前往查勘督令堡夫挑積土方增  
卑培薄預為修理以備秋潮總之臣等受

恩深重所以勵犬馬而伸報效者惟竭此一點血誠圖  
維籌畫上下巡察祝願江湖河海底績永安以祈

仰報

高厚鴻慈於萬一所有伏秋交會水勢工程平穩情形

敬謹繕摺奏

聞仰慰

聖懷伏祈

皇上睿鑒謹

奏

覽水勢工程平穩情形欣慶之懷筆莫能盡今歲南北  
河工卿等勞績實屬昭著俟霜降後另有恩諭



珠批諭旨卷一百七十五之四



總校官庶吉士臣侍朝  
校對官編修臣莫瞻菉  
謄錄監生臣王淦